

Exercicio 01 – Composición sobre textos históricos

Os seguintes documentos deben permitirche a realización dunha composición sobre as Cortes de Cádiz e a Constitución de 1812, no contexto da denominada Guerra da Independencia (1808-1814). Lembra que non se trata de responder a preguntas illadas, senón de realizar unha composición coherente e argumentada, e que na avaliación se terán en conta os coñecementos, a utilización dos documentos e a corrección da expresión escrita.

Doc 1.- As Cortes de Cádiz proclaman a soberanía nacional e a separación de poderes (24/09/ 1810):

“Os deputados que compoñen este Congreso, e que representan á nación española, decláranse lexítimamente constituídos en Cortes xerais e extraordinarias e que reside nelas a soberanía nacional. As Cortes (...) recoñecen, proclaman e xuran de novo polo seu único e lexítimo rei ao señor don Fernando VII de Borbón; e declaran nula, de ningún valor nin efecto a cesión da Coroa que se di feita a favor de Napoleón, non só pola violencia que interveu naqueles actos inxustos e ilegais, senón principalmente por faltarlle o consentimento da nación.

Non convindo queden reunidos o poder lexislativo, o executivo e o xudicial, declaran as Cortes xerais e extraordinarias que se reservan o exercicio do poder lexislativo en toda a súa extensión.”

Doc. 2.- Constitución de 1812:

“Art. 2. A Nación española é libre e independente e non é nin pode ser patrimonio de ningunha familia nin persona.

Art. 3. A soberanía reside esencialmente na nación e polo mesmo pertence a esta exclusivamente o dereito de establecer as súas leis fundamentais (...).

Art. 14. O goberno da nación española é a monarquía moderada hereditaria.

Art. 15. A potestade de facer leis reside nas Cortes co rei.

Art. 16. A potestade de facer executar as leis reside no rei.

Art. 17. A potestade de aplicar as leis en causas civís e criminais reside nos tribunais”.

Art. 27. As Cortes son a reunión de todos os deputados que representan á Nación, nomeados pólos cidadáns na forma que se dirá.

Art. 172. As restricións á autoridade do Rei son as seguintes: Primeira. Non pode o Rei impedir baixo ningún pretexto a celebración das Cortes nas épocas e casos sinalados pola Constitución, nin suspendelas, nin disolveras. Oitava: Non pode o Rei impoñer por si, directa nin indirectamente, contribucións (...).”

Doc. 3.- Decreto de anulación da Constitución de 1812 e da obra lexislativa das Cortes de Cádiz (04/05/1814):

“As Cortes, (...) no mesmo día da súa instalación (...) despoixáronme da soberanía, pouco antes recoñecida polos mesmos deputados, atribuíndoa nominalmente á nación para apropiála para si eles mesmos e dar a esta (...) as leis que quixeron, impoñéndolle o xugo de que forzosamente as recibise nunha nova Constitución (...); e o que era verdadeiramente obra duna facción, revestíano (...) de vontade xeral, e por tal fíxose pasar a duns poucos sediciosos (...) que (...) ocasionaron aos bos coidados e pesadumes (...).

Por tanto, oído o que unánimemente me informaron (...), declaro que o meu real ánimo é non só non xurar nin acceder á dita Constitución nin a decreto ningún das Cortes xerais e extraordinarias e das ordinarias actualmente abertas, a saber, os que limiten os dereitos e prerrogativas da miña soberanía (...), senón o declarar aquela Constitución e tales decretos nulos e de ningún valor nin efecto, agora nin en tempo algún, coma se non tivesen pasado xamais tales actos”.